

甯陵縣志卷之七

名宦志

守官非弋名也守官而近名雖有措置文焉已耳夫一行作吏慮無不殫精竭慮智盡能索以與斯邑籌利害計安全以盡其職之所當爲申其志之所欲出卽日報稱盡是而堂上百里幽隱寧畢燭哉而敢以爲市也且生平之所奏效者安在哉迫則患其擾也而戴星者謂何寬則患其縱也而卧治者謂何猛則患其殘也而火烈者謂何而得以爲名高也雖然武

重刻甯陵縣志

卷之七

名宦

一

城不皆子游河陽不皆潘岳宦者眾矣名者幾何召伯之芟愛及甘棠民有餘思焉君子因其人考其事而遂以得其用意之所在詩曰高山仰止景行行止雖不能至然心竊嚮往之此名宦之所以志也夫此名宦之所以志也夫

東桓鸞字始春龍亢人舒侯相良龍之子也少立操行

漢縕袍糟食不求贏餘貞亮之性著平幼冲學覽六經莫不貫綜推財孤寡分賄友朋泰於待賢狹於養己以世濁州郡多非其人耻不肯仕年四十餘時太守

向苗有名迹乃舉鸞孝廉遷爲膠東令始到官而苗卒鸞卽去職奔喪終三年然後歸淮汝之間高其義後爲己吾縣令長旬月遷河內汲令甚有名迹諸公並薦復徵辟拜議郎上陳五事舉賢才審授用黜佞倖省苑囿息役賦書奏以悟內豎故不省尋以病免中平元年年七十七卒於家

見漢書

唐張巡南陽人聰悟有才幹志氣高邁不等庸俗開元末舉進士調清河令天寶中知真源安祿山之反也巡帥吏民哭於立元廟選兵千人西至雍邱與賈賁

重刻甯陵縣志

卷之七

名宦

二

合賁敗死巡總領其眾守雍邱六十日大小三百餘戰賊敗走軍聲大振時賊將楊朝宗欲襲甯陵以斷巡後巡遂拔雍邱東守甯陵以待之始與睢陽太守許遠相見是日朝宗果至巡遠與戰晝夜數十合大破走之斬將二十殺萬餘人時天寶十五載十一月也遠尋歸睢陽巡留守甯陵賊不敢犯肅宗至德二載春正月賊將尹子奇寇睢陽許遠告急巡自甯陵引兵應之至睢陽督厲將士晝夜苦戰凡十六日擒賊將六十人殺士卒二萬餘眾氣日倍尹子奇屛敗

而復至者四遂將兵十餘萬久圍睢陽時城中食盡
餽援不至雀鼠紙革不足以供巡殺愛妾以饗軍士
死者十之九所餘僅四百人皆莫能起巡向西慟哭
再拜曰臣力竭矣生無以報陛下死當爲厲鬼以殺
賊冬十月尹子奇陷睢陽巡與許遠等死之

金尹升卿大定中爲甯陵令有遺以苞苴者輒罪其修
廢典革弊習多所裨益當道以廉能舉例當陞除士
民以公之去爲憂金主云廉能者卽與陞除無以慰
百姓愛留之心但命進升卿官仍知甯陵

重刻甯陵縣志

卷之七

名宦

三

王渥太原人性明俊不羈博學善談乾興中進士爲
甯陵令卓有治迹遷右司都事惜事功失傳

元董文貞字幹臣河間獻縣人父元舉進士累官中大
夫貞襲父職至元間調甯陵達魯花赤邑苦剽掠公
教民習武備境中以甯歲蝗公齋戒禱之輒飛去不
爲害居官計口受俸餘辭不受後遷蘭陽令以禮折
獄貧馬醫民後乞休家甯陵乃卒葬於邑北之楮堦
村邑人思之因名其墓曰董公塋

趙璧兗州人至治中爲甯陵令值歲大歉民流離殍

疫者甚眾公以災聞於當道者一再賜蠲賑不足則捐俸以濟之全活者數千人明年春雨稍時公攜吏卒各一人自裹糗糒勸課農桑事尙簡易惟恐擾民府有疑獄輒使決之一訊卽得其情四方冤民莫不願直於公者夏大蝗公以文禳之一夕出境其蝻不能去者皆抱草死害不及穀公用法嚴明民不患盜在邑二載以陞任去士民爲去思碑以頌之

明蔡祥北京人廉幹正直撫民有方賦役均平訟獄自息當道薦其才陞知隴州士民思之

重刻甯陵縣志

卷之七

名宦

四

王孟嘗江西安福人歲貢賦性廉平

遇災

則責躬修省期誠意以回天心儒學壞民不能新公捐俸助之故人有干以私者公畧無鄉曲意由此人益憚之後卒於官士民爲之流涕

楊輔直隸邳州人舉進士爲甯陵令老成安靜謙己下賢爲民之意惻如也夏大旱公麻履素服行禱於聖水廟蓋減食修省者浹辰霖雨如注是歲大稔時部署以公在甯陵不盡所長調知金華縣百姓莫不泣然以悲乃易其雙鳥以識遺思云

王潮山西隰州人老成率真一介不取堂東有隙地
圍分許自藝蔬菜日用取給焉餘則分予諸生之貧
者以布袍敝履來迄去邑不能易居官八月值北觀
瀕行邑民往往以百錢贈之公固辭曰媿無後澤又
此去無來路矣二三子何望而遺我耶予不敢受不
報之施百姓環泣而別時仕途無寒官公果不來
石陟青城人小心畏慎廉靜執方嘉靖癸丑柘寇師
尙詔將謀不軌公偵之聞於當道時臺司相觀望忍
不敢發郡之長貳爲其賄所羅也遂玩不爲備公以

重刻甯陵縣志

卷之七 名宦

五

爲憂乃飭武備率眾登陴守之踰月果有歸德之變
公日夜厲循勤苦爲士民先至西門禱於關武安曰
寇壘環郊赤子有屠城之懼使石陟不仁甯無噍類
我家無殃及萬姓以貽神羞因泣下不能語眾皆泣
寇謀知之遂不敢西向後公坐誣去士民遮留遠送
哭聲震野舟人爲之墮淚

熊秉元號可山江西豐城人由進士嘉靖年間以刑
部主事謫任甯陵公下車之日卽以振衰起敝爲己
任首先教養惜閭閻之子貧窮失教城內創建社學

二處四關四處七鄉七處勸輸社學田二十二處共
地十五頃三十畝建學延師嚴稽勤課而城市鄉黨
絃誦相聞又於增修預備官倉之外鼓舞義民創建
社倉一處不匝月而輸粟者二千石民不憂歲甯昔
照地貢賦正項之外別無雜派自邑令陳炫至凡上
司過客極意逢迎民不堪命公至盡革除之甯前城
內東南地窪道路不通居民寥寥每致失事盜飄忽
莫能問公詳請除舊街之外新開街巷八道鑿水門
一二處備畜洩招民墊基居住自此而熙攘漸盛登陴

稱便甯享萬世之利益未之知也至於修學廟興廢
祠增公解建申明旌善等亭設陰陽醫等學置古今
歷代書籍十六部共六百三十本所費不貲皆有關
政教者也且甯原無志公戚然切因陋之悲廣搜博
采出徐君琦之夙藏加學博陳君之載籍又假以呂
司寇之刪定甯居然文獻之邦也迄今續往牒者亦
有所本非公之遺澤與任吾甯者代不乏人功德何
克殫述但如公者乃千百年所僅見者故名宦一席
難償其德席蔭者當重思所報云

縣東關舊有秦公祠經亂焚毀邑人李若星重修設主併祀公於內

秦霑江南崑山縣人由舉人以福建德化縣知縣復除甯陵舊傳因爭辯睢陽三衛軍屯地而病故失考邑人建祠於東關名遺愛祠見祠廟志今並祀熊公者是

劉懋號養衷陝西西安府臨潼縣人萬曆癸丑進士由項城調任甯陵公性寬和正直廉明仁恕不立崖岸不徇局套勤實政革陋規恤民造士省刑薄歛聽斷之餘無事不主和平但遇詖法者獨堅執不爲搖

重刻甯陵縣志

卷之七

名宦

七

廉介自矢三年如一日曾未有敢以苞苴嘗者胥吏畏若神君士民戴如父母以丁外艱去任之日傾國遮道囊橐蕭然隨從僅兩騎乘殊不似爲宦遊者然邑人作廟肖像尸祝於西甕城內扁其堂曰真民父母見祠廟志

儒學名宦

明岳民庇懷慶府溫縣人崇禎間以明經司邑訓導賦性質直課士有方秉鐸二載咸仰師範壬午流寇東犯誓守危疆城破之日賊脅以利刃不屈遂雉經死

士子佩其德訓迄今猶泣頌不衰後闔邑公舉崇祀名宦

司訓無守土之責而岳民庇當逆闖陷城之日義可
以去顧乃堅守不懈雉經捐軀生氣何凜凜也無媿
蒸嘗有光俎豆信不誣云

存舊

主簿名宦

宋苗時中字子居宿州人熙甯初主甯陵簿邑舊有汴
河民甚賴之後爲黃河所堙公因故道而疏鑿焉民
不憂旱者數十年

重刻甯陵縣志

卷之七

名宦

八

宦至主簿微矣乃以疏復汴河名厥政績感而祀之
於以明德罔小而必慶且以知民情之大可見也如
曰卑官小職無以自効嗚呼其果無以自効也哉

武臣名宦

唐劉昌字公明汴州開封府人善騎射天寶末從河南
防禦使張介然討安祿山授易州遂城府左果毅史
朝義兵圍宋州食盡且降昌說刺史李岑曰李光弼
在河陽江淮足兵勢必來援今廩麴尙多若屑以食
可支二十日則救至岑聽之昌乃被鎧登城以忠義

諭賊賊畏不敢攻俄而光弼援軍至賊夜潰光弼聞其謀召置軍中將用之會光弼卒還爲定州平門將李靈耀以汴州反刺史李僧惠欲應之昌請見陳順逆計且泣僧惠卽馳奏請自將討賊故靈耀失助不得逞汴州平李忠臣疾僧惠功殺之昌遁去劉元佐領宣武節度使擢昌左廂兵馬使李納反以偏師收考城充行營諸軍馬步都虞侯元佐攻濮州以昌攝刺史李希烈取汴元佐別將高翼提精卒守襄邑城陷翼赴水死江淮大震昌以兵三千守甯陵希烈

衆五萬攻之昌掘塹以遏地道相拒凡四十餘日賊數敗乃解圍去更攻陳州昌從元佐以浙西兵三萬救之去陳五十里昌薄其軍大戰破之擒賊將翟曜希烈奔還蔡州加檢校工部尙書累封南川郡王昌在邊凡十五年身率士墾田三年而軍有羨食兵械精好邊障安甯及感疾詔赴京師未行卒年六十五贈司空贊曰唐杜牧稱甯陵之解圍劉元佐召昌問曰君以孤城用一當十何以能守昌泣曰始昌令守陴內顧者斬昌孤甥張俊守西北未嘗內顧捧下斬

之士有死志故能守因伏地流涕元佐亦泣曰國家將富貴汝史臣謂不然且勒兵乘城與賊抗所賴賞罰耳今無罪而斬其甥志且離不祥莫大焉甯好事者傳此以益其美非昌志也牧以爲張巡許遠陷睢陽其名傳昌全甯陵而事不得暴於世甯牧未之思耶

見唐書

唐高彥昭

李翱文集作王彥昭

劉元佐之裨將也建中二年田悅

反質彥昭之妻李氏子某女妹妹而劫彥昭守濮陽彥昭以濮歸天子妻子遂遇害時妹妹方七歲賊欲

重刻甯陵縣志

卷之七

名宦

十

舍之妹妹激憤出忠孝語如成人問父所在西向拜哭尋就死天子哀之謚曰愍四年李希烈叛元佐命彥昭與劉昌守甯陵及襄陳連破賊乘勝徑薄甯陵舟乘啣踵進亘七十里彥昭與昌嬰壘以待賊使妖人祈風火戰棚盡坎堞欲登彥昭按劍乘陴士感奮風亦反昌計於衆曰軍法倍不戰賊猥吾寡不如退以驕賊自宋出精兵擣不意功可成彥昭謝曰君少待請盡力乃登城誓衆曰中丞欲示弱覆而取之誠善然我爲守得失在主人今士創重者須供養有如

棄城去則傷者死內逃者死外吾眾盡矣士皆泣下
拜曰公在是誰敢言去昌大慙彥昭擊家牛犒軍士
死戰斬首三千級請援於元佐其屬作書言城且危
彥昭視曰君輕我耶取紙自爲書元佐得書喜曰健
將在西吾何憂乃選兵八百夜艾而入賊不知詰旦
傳城士奮出希烈大敗取其旆斬首萬級追北至襄
邑收賊貲糧而還軍聲大振自是賊不復犯甯陵元
佐表其功拜彥昭御史大夫實封五百戶

見唐書李希烈傳

王栖曜濮陽人

守甯有軍功事未詳

重刻甯陵縣志

卷之七 名宦

十一

曲環山西安邑人客隴右少善兵法資勇敢善騎射
李希烈陷汴州環守甯陵戰陳州斬賊三萬五千級
擒其將翟崇暉進檢校工部尙書兼陳州刺史希烈
平改陳許節度賜封三百戶二州比爲寇衝民苦剽
鹵客他縣環謹身節用寬賦斂簡條教不三歲歸者
襁係訓農治兵穀食豐衍轉檢校尙書左僕射貞元
十五年卒年七十四贈司空

見唐書

栢良器字公亮魏州人父造以獲嘉令死安祿山難
乃學擊劍欲報賊父友王奐爲光弼從事薦之光弼

授兵平山越遷武衛中郎將時年二十四更戰陣六十二李希烈圍甯陵過水灌之親令軍中明日拔城良器以救兵至擇弩手善遊者沿汴渠夜及旦伏弩發賊乘城者皆死錄功封平原郡王入爲左神策軍大將軍知軍事圖形凌煙閣終左領軍衛大將軍贈陝州大都督

見唐書

明溫良山西榆林人保定總督右翼營遊擊崇禎末年盜賊蜂起東西南北往來飄忽無虛日所至如入無人之境時有東來土寇混名一條龍盤居邑東北之

重刻甯陵縣志

卷之七

名宦

三

趙村集計將薄城良奉臺檄師援虞城過甯邑眾求移兵擊之寇謀知西遁良夜襲之達旦至邑西北三十里趙二庄賊失備殺斬甚眾狼狽西奔至汴南撲滅焉良勇悍出眾號令嚴明所到之處鷄犬不驚軍士凱還獲賊輜重各分酬所主之家凡餉兵之家兒童嬉聚妻孥晏然若不知有兵者良偶抱病猶疾趨解虞城圍賊遁不意病劇不祿虞人慟哭罷市祀名宦祠甯實佩德獨忘報耶

祀典曰有功德於民者則祀之所以誌不忘也按舊

志劉昌高彥昭等六人皆以身捍城池禦民於難不
必盡有專城之寄而公爾忘私厥功偉焉其事實時
散見於書傳中可考而知也但舊志與名宦雜紀今
別而傳之綴於名宦後以與善斯土者同誌不朽云
鄉賢 行實詳人物志中

田王孫

葛龔

張遷

夏侯訢

劉思立

劉憲

劉熙古

劉蒙正

重刻寧陵縣志

卷之七

名宦

十三

劉蒙叟

程迥

范仲淹

喬恕

呂坤

苗文英

王印

喬進璠

呂慎多

呂真知

王應登

翟三策

盧宗泰

劉景世

符希孟

李學恕

曹有謨

太史傳伯夷曰夷齊賢得夫子而名益彰淵雖篤學
附驥尾而行益顯今按甯陵鄉賢實求其爲人道德
文章經濟事業如唐宋之諸劉暨程呂先後沙隨皆
於聖人之道實有所得故其所自樹立無所苟雖與
日月爭光可也其他皆志行矯矯亦與吾道有所發
明卽舍生取義類有古烈士風概之以賢具體一體
不妨各彰於世概之以鄉隘矣雖然猶是生於鄉者
也而况祠而祀之之安在孔子之徒不必無優劣得
附於聖人之門者蓋亦難矣鄉賢之所重不在彼而

在此